

欽定剿平粵匪方略

欽定剿平粵匪方略卷九十四 甲寅年

五月十五日

癸丑

河南巡撫英桂順天府府尹楊

需奏言南竄逆匪現復回擾隨州信陽防堵緊

急陝西提臣桂明計日內已到信陽臣等飛催

該提督速由黃土關進剿以遏賊鋒臣楊需酌

帶兵勇於十三日馳赴信陽相機防剿並飛飭

河北鎮道將前調之官兵六百名星夜馳赴信

陽如兵力不敷尙有臬司林揚祖帶赴歸德之
兵勇八百名可備續調儘南路緊急東路稍鬆
卽一併調赴南路爲迎剿之計以杜賊蹤北竄
奏入報

聞

十六日

甲寅

僧格林沁西凌阿托明阿奏言臣等

連日督兵進攻賊巢該逆堅壁死守現在兩岸

長濠均已工竣兵丁沿濠紮營逼近賊壘惟地方較廣兵力不敷兜圍惟有慎防西北其東南兩面兵力單薄僅敷防守濠牆盤詰奸細設逆匪大股乘夜衝撲恐難攔前截剿臣等不時親身周歷並派員實力巡查嚴飭各營互相聯絡

奏八

上命軍機大臣傳諭僧格林沁曰逆匪竄踞遼鎮已及

月餘僧格林沁統領重兵勦辦此股賊匪是其專責
乃軍營布置不過用礮轟擊及兩岸挖濠而已逆匪
堅匿不出我兵卽束手無策似此曠日持久糜餉老
師勦辦何時蕨事所稱東南兩面兵力單薄若逆匪
衝撲恐難攔截等語可見該大臣於西北一帶布置
尙屬嚴密而東南兩面竟毫無把握設該逆乘虛竄
逸與高唐州賊匪聯爲一氣則勝保一軍勢必腹背

受敵且恐賊衆另踞村鎮恃險負隅攻勦更形棘手
著該大臣督飭各路將弁迅將此股賊匪就地殄除
或先於附近設伏誘令出巢四面兜擊一鼓殲滅斷
不准再令免脫又致蔓延他省兵勇精銳未有過於
此者人衆未有多於此者該大臣統領全軍日久無
功尙有何顏對朕若不趕緊圖功肅清畿輔寬典不
能屢邀該大臣其自量之

十七日乙卯官文慶如貴陞奏言賊匪占踞監利

縣城經臣等添派廩生張于銘等帶勇前往協

剿四月二十五日守備宗維清由中路前進守

備福興等在後接應張于銘等督帶礮船礮勇

由大江水路策應鹽經厯吳振鏞等由西路前

進同知湯譽光等督勇策應於二十七日在大

馬河地方會齊出隊遇有賊匪千餘人彘擁而

至宗維清身先士卒奮力攻擊張于銘等衝入賊隊殺賊數十名巡檢俸家林等四面圍剿殺賊一百餘名賊匪敗走兵勇追至劉家鋪地方遇埋伏賊匪數千人我兵槍礮齊施鏖戰三時之久轟斃黃衣賊目一名殺斃一百餘名生擒十五名該匪敗退入城二十八日復傾巢而出分五路圍撲宗維清等亦分隊迎擊李光榮抄

至賊後督勇登陸掩襲守備高騰滿等躍過賊營濠塹我兵勇氣百倍乘勢痛勦殺斃賊目四名賊匪一千餘名撲水淹死者不計其數生擒二百餘名其脅從在馬前投降者約五六百名當卽釋令歸農賊匪敗竄宗維清等當將縣城收復三十日復拔營追勦逆匪於中車灣地方設立木卡宗維清福興高騰滿張于銘楊際春

等卽督兵勇進剿殺斃空隄築卡賊匪數十名
吳鵬程等由隄下抄出賊陣之後連放大礮賊
匪紛紛倒斃追擒賊目一名復殺斃五十餘名
生擒十名統計殲斃賊匪三千餘名燒死溺斃
之賊無數燒燬木卡二座奪獲槍礮等件甚多
敗殘餘匪逃往東河一帶臣等現飭宗維清等
乘勝追剿暫令參將佟攀梅會同旗營官兵仍

駐了角驛勦辦江陵等處土匪俟事竣再飭前往武昌應援所有出力文武員弁統俟查明奏請分別獎勵

官文慶如貴陞又奏言臣等接據探報宜昌賊匪在沿江一帶擄掠已下竄至宜都枝江二縣境內當卽酌調協領依西布遊擊王國才帶領弁兵由臣貴陞統帶於五月初九日前往堵剿

又經江陵縣知縣陳均遠飭義勇曹立全帶水
勇五百名自江口前進復調張于銘帶勇五百
名過江往松滋迎勦以扼賊下竄之路川兵若
已移營前進上下夾攻不難撲滅現已飛咨湖
南撫臣暨岳常澧道趕緊撥兵堵勦以防南竄
奏入

命軍機大臣傳諭官文曰此次收復監利縣城辦理

尙爲妥速其沔陽江陵交界地方土匪未靖仍應防
其與逆黨勾結煽惑復滋蔓延現旣飭令參將佟攀
梅會同旗營官兵駐守了角驛扼要勦辦務須速籌
殄滅並與守備宗維清等將敗逃餘匪竭力搜捕毋
任此勦彼竄目下監利沿江一帶情形較緩所稱俟
此股土匪辦竣後卽飭佟攀梅赴援武昌自係爲慎
重根本起見惟天門潛江等處是否尙有賊蹤安陸

荆門兩屬逆勢多寡何如西路獲勝之軍能否泝流而上惟在隨時相機籌辦前踞宜昌之匪現竄至宜都枝江二縣該處界接楚南貴陞已帶兵出境堵剿知縣陳均遠等分路前進扼賊竄路著卽嚴飭該員弁等合力圍剿並飛咨駱秉章等飭屬一體兜撿勿令與湘潭靖港回竄之賊會合勾引四川官兵當已趕到著官文相機調遣仍就荊州現存兵勇竭力捍

集之卷之四
一
禦隨時確探賊情豫籌布置務當計及全局不得顧
此失彼所有帶勇出力之官紳宗維清張于銘等均
著先行酌予獎勵

上諭內閣曰官文等奏官兵進剿監利賊匪疊獲勝仗
殲擒賊目夥賊統計三千餘名溺斃賊匪無數立將
縣城收復辦理尙爲得手在事出力之官紳兵勇著
官文等酌量保奏候朕施恩

同日和春福濟奏言查豐縣敗殘餘匪逃往霍邱之李家橋經參將劉玉豹等合力追勦殺賊數百餘名生擒三十餘名餘賊梟水而逃淹斃殆盡奪獲黃旗刀矛多件舒城久爲賊匪占踞現經知縣張埴招集鄉團三萬餘人派趙維璵等先攻桃鎮並分路進攻舒城四門每門突出賊匪數百人經該鄉勇等奮力攻擊該逆敗退

入城共計殺賊四百餘名勇目沈鋈帶勇攻入
桃鎮賊巢殺賊十餘名餘皆紛竄隨將桃鎮收
復又據署和州知州金寶樹稟報賊船大幫在
各江口停泊屢被滋擾經該州添募兵勇於沿
江叢葦中埋伏該逆聞風畏懼裹脅之人乘閒
逃散其停泊各江口賊船數百隻均已全行竄
駛下游各江口並無賊船潛匿

和春福濟又奏言廬城逆匪經官兵節次進剿
勢已窮蹙亟應乘勝進攻迅圖克復現派常清
等分三路進兵 臣和春居中調度 臣福濟在後
路接應各軍奮勇爭先我軍攻擊多時該匪堅
伏不出惟南門突出逆匪三四千人前來撲營
卽經江忠濬等開礮轟擊賊勢不支旋卽敗退
官兵追至城邊賊匪逃入城內閉門堅守共計

斃賊三四百名生擒四名奪獲旗幟器械多件
惟賊勢雖蹙而城大且堅非四面環攻難期得
手西路官兵進勦不甚勇敢現已添派江忠濬
帶楚勇二千餘名程智泉帶廣東兵勇七百餘
名前赴西路於得勝門一帶擇要紮營會合圍
勦奏入

上諭曰進勦雖銳然機謀不慎每爲賊覺斬殺並不甚

多果能計出萬全何至蕞爾廬城曠持若是耶

上命軍機大臣傳諭和春福濟曰和州賊船下竄江浦六合又形喫緊且難保其不再竄和州和春等仍當督飭練勇認真守禦一面知會琦善於下游沿江處所設法攻截一面知會袁甲三於上游滁州等處豫籌扼守毋任賊蹤來往自如至廬城日久未下著卽迅圖克復卽行分兵沿江進剿以爲奠安全皖之計

廬州南鄉居民薙髮集團攻復桃鎮是其不甘從逆
已可概見朕念其被脅之苦不忍咎其既往果能殺
賊出力該提督等加以獎賚亦無不可舒城如能克
復亦可橫扼廬桐之衝斷賊接應有機可乘萬勿坐
失其六安霍邱等處仍著傳知秦定三設法進攻不
得專以扼守正陽防賊回竄爲詞致成株守

同日百勝王夢齡奏言前次豐縣竄出逆匪尙

有騎馬賊數百名由河套內虜水過岸經臣等
與李湘棻分投截殺僞檢點總制等官八名轟
斃逆匪二百二十六名又生擒僞將軍總制等
官十名長髮老賊一百四十三名昨聞連鎮逆
匪北竄臣等卽飛飭文武加意嚴防現當黃水
長發之際豐工漫口以下河湖相連汪洋一片
與三四月間情形不同若該逆由豐沛南遁臣

等卽當督兵扼擊不任一名偷越惟徐城北岸
爲通京陸路並無險要可扼臣百勝現移營城
北三十里之王可洛地方該處有黃河漫水一
道策馬可渡防禦最爲喫重臣等前獲僞將軍
張泳荒搜得逆書一冊內敘逆賊洪秀泉自廣
西竄至江甯俱用林瀨詳李開芳爲先鋒攻陷
郡縣省城多處該二賊著名驍悍現因臨清賊

匪被大兵掃滅孤立無援急思逃回不惟高唐
之賊不敢久踞卽連鎮之賊亦圖續竄若被潰
圍而出勢必拚命狂奔亟須設法使其棄馬而
步該逆無可衝突卽可悉數殲除臣等現於王
可洛河底暗釘木椿中夾鐵錐並於兩岸多設
陷阱使賊騎不能竄越又派遊擊胡松額帶領
兵勇五百名移紮前路韓莊地方如遇逆賊關

入卽與該處團練繞出賊後與臣等兩面夾擊其豐工南北兩岸前派參將高培都司崇順帶領大同兵一千一百名扼防南岸下營之郝家集潘家屯等處現有參將張琴堂等帶兵六百名駐紮以爲後路援應臣等仍不時飛探賊蹤督率兵練併力截勦斷不敢坐失事機奏入

上諭曰李湘棻安坐徐州並未迎擊逆匪汝二人雖狂

於外官習氣必入其名亦是常事惟入奏不實自問
當得何罪前次逆匪偷渡致滋蔓延未將汝二人正
法尙冀奮發有爲今如是負恩雖立置重典毫無可
惜現踞高唐逆匪若任令竄過河去必將汝二人軍
法從事別無可論也

十八日丙辰勝保奏言臣前將高唐州城外賊壘

焚燬該逆連日不出臣派馬隊晝夜圍攻賊屢

遣奸細出探在平博平路徑每於夜間突出撲營俱經我兵擊回十三日夜間賊衆數百直撲西面培成那敷德之隊臣派兵接應合力奮擊賊敗退後復撲東南魁福之隊又經我兵擊退先後傷斃賊匪數十名臣本欲令其竄出前截後追可以速滅詎該逆見我兵布置甚嚴欲竄不敢偪令城內居民於周圍城根挖濠自衛深

至丈餘臣因飭趕造雲梯二十餘架以爲攻城
之用十五日出隊善祿攻其東面崇恩與侍衛
恭鈺攻其西面德勒克色楞於南門左右排列
馬隊以俟賊出截殺臣親督正定天津及健銳
火器營官兵攻其東北已革五品頂戴張翊國
帶領江南練勇五百名隨同進攻賊見我兵偪
近隨於城上開放槍礮從暗擊明兵勇間有損

傷仍復鼓勇直前填濠而過已經樹立雲梯賊
衆情急矢石交下並豫行拆毀民房梁柱安設
城頭我兵甫欲登城賊卽推木壓下兵勇墜地
雲梯斷折一時未能得手臣仍當隨時相度機
宜迅圖克復奏入

上命軍機大臣傳諭勝保曰賊匪占踞高唐州以來已
將半月據勝保奏稱於十五日分隊進攻仍未得手

該城周圍僅八九里收復本易爲力惟遷延日久則賊之守衛愈密而我兵之銳氣漸挫且連鎖賊匪時思越濠遠遁若竟全股南竄與高唐之賊聯絡則勝保一軍前後受敵勦辦更致費事經朕疊次申論豈勝保身在行間竟未慮及吉林馬隊武成永固礮位已由僧格林沁令副都統麟瑞管帶赴營濟甯州練勇亦可趕到統計隨營步隊兵勇亦不爲單著勝保

督同各員弁迅籌進攻務將州城卽日收復並將此股逆賊就地殲除毋得以竄出之後較易勦殺爲詞致賊蹤蔓延他處

同日曾國藩奏言查靖港餘匪業於四月初八九等日全竄下游岳州以上現無賊蹤署提督塔齊布卽日先赴岳州臣親督水陸兵勇繼進自岳州以下卽出湖南地境臣有援鄂之責自

應出境勦賊撫臣略秉章職任地方難以出境
署提臣塔齊布亦有地方專責未敢遽赴外省
惟塔齊布與臣共事年餘實見其忠勇絕倫堪
膺辦賊重任今同奉

諭旨統兵東下該署提督自應卽令遄征無庸稍涉拘
泥株守本省其提督印務應否派員護理抑或
帶印出省之處伏候

聖裁

會國藩又奏言現在賊船全竄下游所有陸溪
口倒口金口等處藏泊船隻之所皆被該匪占
踞並於口門築造礮臺兩岸修置土城以陸路
之賊守河干之船爲抵死抗拒之計臣此次整
旅東下喫緊固在水路而制勝尤須陸軍日內
將陸勇嚴汰另募添用勁兵以濟勇之不足水

師亦重整規模廣東派來之兵與廣西新招之
勇計本月內可以到省衡州新造之船與長沙
重修之船出月亦可竣工一俟料理完畢臣卽
星夜遄征誓殲此賊以雪挫敗之恥而贖遲延
之罪奏入

上命軍機大臣傳諭駱秉章曾國藩塔齊布曰前此回
竄楚南之賊節經曾國藩會同塔齊布等於甯鄉湘

潭痛加勦洗阻扼兇鋒所有竄踞靖港餘匪現已全
數竄往下游是南境情形稍緩而鄂省望援更急曾
國藩添募水陸兵勇及新造重修戰船既據奏稱已
可集事則肅清江面之舉仍藉此一軍以資得力該
省大股逆蹤尙踞漢陽漢口一帶其隨州應山等處
匪黨奔突宜昌下竄枝江賊勢如此延蔓若剿辦再
有稽遲東南大局不堪設想塔齊布膽識俱壯堪膺

勦賊之任著駱秉章卽飭該署提督統領弁兵迅速
出境與曾國藩會合進攻務須酌度機宜隨勦隨進
方能次第殲除曾國藩與該署提督共辦一事尤應
謀定後戰確有把握萬不可再致挫失該署提督等
仍當兼籌全局與官文台湧青麀等聯絡聲威藉資
援應所調廣東紅單等船月內應可由海入江已節
次諭令琦善向榮飛速迎提分起布置以備派流而

上爲沿江節節堵截之用至塔齊布現在出省其所
署提督篆務卽著駱秉章委員接署

曾國藩又奏言臣係革職人員蒙

恩飭令督勇自效此後出境勦賊所有一切軍情必須
隨時奏報可否容臣專摺奏事之處出自

天恩奏入得

旨允行

同日

上命軍機大臣傳諭僧格林沁曰前因僧格林沁奏進
攻賊巢情形仍未能得手當降旨諭令迅督各路將
弁四面兜擊以期一鼓殲滅近聞該處軍營所以不
能得力之故總由帶兵各員不思齊心進勦而僧格
林沁空握總統之名又不肯破除情面令在必行甚
至任令兵丁占居民房營盤之中所餘無幾且所挖

之濠盡在北面而南面空虛任賊行走我兵紮營率
皆在數里之外虛張聲勢徒費鉛藥似此疏懈耽延
無怪逆匪屢次竄出而僧格林沁毫無知覺也各路
帶兵官員究竟能否用命若積習相沿不遵號令必
當從嚴懲辦僧格林沁身受重恩非尋常統兵大臣
可比亦復何所瞻顧不肯破除情面將士不能用命
卽係該大臣無能之罪雖與士卒同甘苦亦不過小

節微長，豈朕所期於該大臣者。著僧格林沁嚴督各弁，偏近進攻。若再以恐傷官兵爲詞，不肯努力接仗，卽以軍法從事。僧格林沁於將弁，可以姑容。朕於僧格林沁，斷不能以姑息示恩。僧格林沁撫衷自問，當亦知之。儻日內不能將逆匪殄滅，致令又向他處占踞，朕亦別無他論。自有懲辦之法。至蒙古官兵勤勞久著，值此天氣漸炎，於水土節候不甚相宜，必須及

早奏功庶得凱旋休息該大臣務當仰體朕心傳諭諸軍同心協力迅速蕝事共膺懋賞

二十日

戊午

漕運總督邵燦江南河道總督楊以

增奏言查皖賊屯踞蕭碭境內意圖分道直撲徐州府城該道王夢齡於城外紮營兼顧郡垣該鎮百勝自應統帶兵勇扼其北渡乃藉口於賊衆我寡任其紮筏從容渡河及賊至徐境有

練勇七千餘人齊赴郡城情願隨同殺賊而該鎮又復遷延不進直至賊匪全數渡河始帶兵前往希圖掩飾耳目此次逆賊由豐縣竄出經勝保追至河岸勦殺殆盡逆匪梟水偷渡器械全無百勝接仗失利致令兵勇傷亡追餘匪由西南竄至蕭縣百勝帶兵往追並未接仗聽其沿途裹脅而去嗣聞賊住蒙城王夢齡商令該

鎮帶兵追勦仍復中途觀望謂賊已遠遁帶兵
空還是該鎮之畏葸無能前後一轍應請

旨將已革暫留徐州鎮總兵百勝先行撤任一面請
旨迅賜簡放以重職守奏入

上命軍機大臣傳諭邵燦楊以增曰徐州係江南重鎮
據黃河之險實力防守足以扼賊往來之路現在連
鎮之賊亟思南竄卽高唐逆匪亦困守孤城勢難久

占大兵圍勦卽能就地斬擒難保無零星散匪捨命
南奔復向豐工一帶鳧水逃生而廬州之賊尙未殲
滅更恐分股北犯希圖援應是徐州之緊要較前尤
甚該處文武員弁果能與大軍前後夾擊更可得手
傅振邦署理徐州鎮總兵到任需時卽著與慶暫行
代理該參將距徐較近且係曾經行陣之員著鄒燦
等飛飭來徐以資堵禦徐屬練勇七千餘人前此已

自請前驅殺賊士氣尙爲可恃若加以鼓舞振作使
與將弁官兵同心勦賊定能制勝况黃流湍急能於
南北岸及上下游等處層層布置該逆豈能飛渡邵
燦揚以增於該鎮道等之能否勝任均應據實入告
如興慶抵徐後未可深倚卽當隨時奏聞毋稍回護
若連鎮高唐之賊被勦窮竄正可迎頭截擊斷不准
再任偷渡該督等務當認真督率毋得稍存大意

上諭內閣曰已革徐州鎮總兵百勝畏葸無能實堪痛恨著卽發往新疆效力贖罪所遺徐州鎮總兵員缺著傅振邦署理該員現在向榮軍營著飭令卽赴新任未到任以前卽著興慶暫行代理

二十二日 庚申 僧格林沁西凌阿托明阿奏言 臣

僧格林沁接奉

諭旨令查營中積習 臣所統各營將士非不精銳惟逆

匪所踞村鎮壁壘甚堅各營步隊備嘗艱辛兼
之身冒鋒鏑傷亡較多以致日形懦弱臨敵不
免退縮臣亦知法貴森嚴實因所統步隊皆係
滿蒙勁旅一旦繩之以法殊覺可惜是以總以
善言開導冀其共明大義未忍斬殺一兵惟人
數較多惟有顛懇

天恩將臣重懲仍令帶罪圖功各營或能知所感惕鼓

舞奮興似於軍務有益奏入

上命軍機大臣傳諭僧格林沁西凌阿托明阿曰僧格林沁勦辦直境逆匪經朕查知疏懈耽延各情降旨嚴催進兵乃據奏稱各營步隊倍著艱辛因傷亡較多不免恇怯不忍繩之以法僅以善言開導仍不能無頑梗之人試思行軍紀律首貴嚴明若以該官兵曾經身冒鋒鏑偶爾臨敵退縮遂置不問各營紛紛

效尤何以處之且各路軍營所謂官兵孰非久經行陣之人勇敢者賞退怯者誅斷難稍涉游移如不能用命卽當查明首先退縮之人立以軍法從事庶足懲一儆百儻一味姑容致各兵丁習以爲常所謂素稱勁旅者安在僧格林沁總統全軍不能破除情面嚴督馬步各隊剋日攻剿但言懇恩重懲該大臣亦思似此糜餉老師豈屢次請罪所能塞責僧格林沁

著先行傳旨申飭各營既經逼近賊壘南面亦不空
虛該匪無所逃避卽著親督大軍實力進剿攻破賊
巢一鼓掃蕩將弁中有抗不遵令者無論滿蒙各旗
卽在軍前正法不得再以可惜不忍等詞瀆奏如該
逆仍前竄出致與高唐一股會合惟僧格林沁等是
問

同日琦善奏言 臣接奉

諭旨令分水軍爲三復准向榮函商分提紅單船應用
臣已囑其徑行酌提果得水師用命一經分提
上駛總可斷賊接濟至其駐泊之所又必與陸
軍相表裏蓋陸路無兵之處水師向不敢泊船
而指定駐泊之處岸上又未必能安營但取聲
勢相倚卽可互相應援惟是鎮江師船不甚得
力紅單各船二月自粵放洋迄今尙無過浙消

息其爲沿途逗留可知臣與向榮同膺重寄且
蒙

指授方略惟有殫竭心力斷不敢稍分畛域有失機宜
奏入

上命軍機大臣傳諭琦善曰據奏遵籌師船布置機宜
該大臣旣與向榮函商將紅單船隻分提上駛卽著
飛催辦理現在此項船隻尙無過浙信息其爲沿途

遑留誠所不免鎮江師船既不得力廣東戰艇又復
遷延江面何日肅清覽奏實深焦灼該大臣與向榮
共辦一事總當妥速會商迅圖克復瓜州再行次第
進剿不得專以將弁疲玩爲詞冀可自卸遷延之罪
也

琦善又奏言臣接奉

諭旨令將宿遷防兵調赴和州剿賊伏查和州賊船現

已全赴下游而北路連鎮竄出之賊現踞高唐
其地爲驛站大道距宿遷不過數程就目下情
形而言宿遷最爲喫緊若將防兵撤赴和州則
宿遷空虛民情不免驚恐臣不敢稍有拘泥仍
令防兵駐紮宿遷以資堵禦

同日向榮怡良許乃釗奏言臣等欽奉

諭旨令將已故江南提督福珠洪阿殉難情形詳細查

奏臣等查福珠洪阿前由松江帶兵馳赴金陵
於咸豐三年正月十二日抵省駐紮雨花臺經
將軍祥厚等邀令進城在聚寶門會同堵禦日
夜接仗二月初十日卯刻據報儀鳳門攻破福
珠洪阿隨帶松江兵三百餘名前往救應馳至
鼓樓迤北遇賊巷戰斃賊多名賊即四散正追
殺閒又報通濟門危急轉往赴援馳至南門賊

匪大股上城與滿漢官兵對仗福珠洪阿督兵
登城殺賊衆寡不敵身受重傷數處周身血污
所帶官兵大半傷亡勢難抵禦福珠洪阿猶手
刃數賊罵不絕口遂被戕害 臣等徧加諮訪無
不異口同聲是其殉難情形實無疑義均奏入
報

同日官文慶如貴陞奏言接據知府達昌阿等稟稱四月二十五六等日署總兵訥欽等各帶兵勇水陸並進連獲勝仗生擒逆首胡得義等七名五月初一日復率湘湖練勇分路進攻該匪力不能支紛紛逃竄當將宜昌府城克復訥欽乘勝追至離城三十里之虎牙灘口燒燬賊船九隻殺賊無數因江水泛漲羣匪敗竄上船

順流直下不能追及卽率兵勇回城招集流亡
民心稍定臣貴陞恐其下竄荊州卽帶滿漢官
兵水陸堵勦而該匪擾及宜都枝江關八松滋
復竄北岸之董市地方揚言直撲荆郡因聞川
兵已抵宜昌荊州布置周密盡行過江南竄現
在南岸彌陀寺地方搶掠船隻希冀水陸分竄
臣貴陞卽飭千總畢金科等過江繞路往截並

統帶協領依西布等分起渡江追襲臣官文等
於沿江各要隘添派兵勇設卡嚴防杜其回竄
並飛咨湖南撫臣駱秉章迅卽撥兵擇要堵截
其四川松建二鎮官兵於收復宜昌後始到疊
經札催進兵沿江一路追擊迄今未達荆郡實
屬遲滯現仍嚴檄飛催奏入

上命軍機大臣傳諭官文慶如貴陞曰宜昌府城收復

該逆渡江南遁擾及枝江宜都關入松滋縣境貴陞
現飭千總畢金科等先行繞越往截並自行統帶依
西布等滿漢各軍渡江追襲務將此股烏合匪眾無
分水陸四面兜擊既不可使之伺隙南犯尤宜防其
被勦窮蹙復行回竄軍情變幻靡常必須隨時察看
何路緊要卽赴何路截勦勿令再滋蔓延荊州上游
雖已肅清其安荊一帶及沔陽潛江各屬是否尚有

賊蹤官文於沿江要隘駐兵設防杜賊回竄尤應兼
籌西北兩路妥爲守禦四川松潘建昌兩鎮官兵何
以如此遲延所有帶兵之總兵雙保福新著官文等
查明如係有心逗留卽著據實叅辦一面檄提到營
或防或剿擇要調遣

上又命軍機大臣傳諭駱秉章塔齊布曰宜昌收復賊
衆竄擾松滋聞荊州兵勇水陸並進遂渡江南竄現

在大江南岸彌陀寺地方搶掠船隻希冀水陸分竄
是湖南與湖北交界之處情形甚爲喫緊著塔齊布
速帶精兵與曾國藩所帶船勇水陸迎擊並著駱秉
章嚴飭岳常澧道及地方文武撥兵擇要堵截萬不
可令賊匪復竄南省現在台湧舒倫保已由德安一
路督兵南趨駱秉章塔齊布務當與官文等隨時知
照彼此併力夾擊將此股逆匪悉數殲除

二十三日

辛酉

向榮奏言臣接據探報逆匪竄入

太平府城滋擾並有窺伺東壩之信該處乃入

蘇州捷徑

臣

聞信後卽派已革提督鄧紹良選

帶勁兵前往截勦乃該逆聞風先遁竄回金陵

並有上游賊船千餘隻由和州東駛而下隨將

太平郡城收復當卽飛調鄧紹良回營惟該逆

負固伏匿非誘之使戰不能大加懲創參將蔡

應龍等帶領兵勇繞至鍾山之後由高處瞭望
太平門外賊營維時龍脖子一帶有賊窺伺遙
見我兵人數無多潛由右山包抄而上蔡應龍
等分兵夾擊賊卽敗潰復開門率衆回撲我軍
且戰且退將賊誘近明陵之西伏兵齊出兜擊
臣聞該逆被誘出城卽親往督勦適朝陽門亦
出賊千餘人救應各營盤排列大礮轟擊斃賊

甚多餘衆驚潰經伏兵橫衝而出斬馘溺斃者
無數適七橋甕兵勇聞聲出應繞城喊殺賊中
槍礮齊施我軍冒死衝鋒奈城下濠水寬長末
由飛渡旋聞通濟門城上賊守稍疏復派總兵
明安泰堵勦洪武門之賊福興堵截雨花臺之
賊蘇布通阿督同遊擊張國樑直取通濟門於
四鼓銜枚潛進前阻重濠張國樑督領兵勇鼻

水渡至城下正欲架梯登城詎被賊營知覺城上輒石火罐紛紛擊下兵勇不能援登仍行退回該逆乘我軍撤動突於聚寶門出賊一股繞定河橋來抄我後各路兵勇聞賊出拒衝入賊隊該逆見我軍勇猛全股驚潰官軍分投截殺殲斃不少追至城濠城上礮子如雨我兵難以進追現在屢催鎮江進兵而余萬清節次稟報

不過逐日打仗未能迅速克復惟望紅單船早到俾南北水陸合擊庶可漸次得手此次太平失而旋復學臣孫銘恩尙無下落已飭確切查明辦理奏入

上命軍機大臣傳諭向榮曰逆匪竄入太平府城聞我兵進勦退出郡城該逆詭譎異常難保不復圖窺伺且上游賊船千餘隻去和州而東駛是江上賊船往

來自由意在乘隙肆擾此時總以肅清江面爲最要
機宜昨據琦善奏紅單船尙無過浙信息其爲沿途
逗留已可概見著該大臣飛速迎提一俟此項船隻
駛入大江卽妥爲布置儻能將江面賊船次第肅清
則勦辦自可得手至金陵逆匪雖經我兵連日誘敵
仍不過小有斬擒師老餉糜罪將誰誘余萬清攻勦
鎮江賊匪亦不過逐日打仗未能克復余萬清本係

獲罪之員如果不知奮勉卽行據實嚴叅前任學政
孫銘恩下落並著查明具奏